



## **PARTORDING NI PARMINGGUON DI MINGGU ROGATE**

☐ Ev. 1 Johannes 5 : 1 – 5

☐ Ep. 1 Samuel 1 : 9 – 18

**TOPIK:  
TANGIANG NI HALAK NA PORSEA**



**HURIA KRISTEN BATAK PROTESTAN  
KRAMAT JATI  
Minggu, 9 Mei 2021**

## 01. PAMUHAI :

U : Selamat Ari Minggu ma di hita saluhutna. Di Minggu ROGATE na marlapattan MARTANGIANG, diarahon do hita marhite topik : TANGIANG NI HALAK NA PORSEA. Antong tapuji ma Tuhanta dibagasan unduk dohot serep ni roha. Marende ma hita.

## 02. Marende SDJ No. 654 : 1 – 2 “MARPUNGU SUDE” BL. No. 654

- ❖ *Marpungu sude mangido tu Tuhanta*  
*Asi ni rohaNa nang lomoNa i*  
*Naeng pasohotonNa do parungkilonta*  
*Sai ramotanNa do HuriaNa i. (Jongjong)*
- ❖ *Diparmudumudu Tuhanta do hita*  
*Sai diiringiring HuriaNa i*  
*PanumpahionNa do pamonang hita*  
*Jahowa Debata na sun gogo i.*

## 03. VOTUM – INTROITUS – TANGIANG:

U : *Marhitehite Goar ni Debata Ama, dohot Goar ni AnakNa Tuhan Jesus Kristus, dohot Goar ni Tondi Porbadia na tumompa langit dohot tano on. Amen.* Marsoara olopolop ma hamu paboahon, patubegehon hata i, pasar hamu ma i ro di ujung ni tano on, dok hamu ma: Nunga dipalua Jahowa naposona si Jakop. Marolopolop tu Debata ma ho, ale sandok tano on ! Endehon hamu ma hamuliaon ni GoarNa, marmulia ma bahen hamu pujipujianNa. Haleluya!

**R : (Mangendehon): Haleluya, Haleluya, Haleluya!**

U : **Martangiang ma hita** : Ale Tuhan Debata, Pargogo na so hatudosan ! Holan ala ni asi ni rohaM saming do, umbahen

na tarbahen hami marpungu di joloM, marsada ni roha martangiang tu Ho. Diparbagabaga Ho do di bagasan HataM: Molo adong dua manang tolu halak marpungu marhitehite GoarMu, lehononMu do na pinangidonasida. Ale Tuhan pasaut ma bagabagaM i, tangihon ma pangidoannami, lehon ma na tau hangoluannami. Lehon ma di hami saleleng di hasiangan on parbinotoan di hasintonganMi, dohot di hangoluan salelenglelengna marhitehite AnakMu, Tuhan Jesus Kristus, Tuhannami. Amen. **(Hundul)**

**04. Marende SDJ No. 814 : 1 “SAI AJARI AU TUHANKU” BL No. 814**

- ❖ *Sai ajari au Tuhanku di na martangiang au  
Patuduhon tu rohangku sangkap ni rohaM di au  
Songon na binaen ni Jesus na manaon humophop au  
Unang lomo ni rohangku, lomo ni rohaM ma saut*

**05. PATIK:**

**U : Tatangihon ma Patik ni Debata di Minggu ROGATE sadari on, i ma tarsurat di Rom 12 : 12 ; “Marlas ni roha ma hamu mangkirim! Marbenget ni roha ma di haporsuhon! Jugulhon hamu ma tangiang!”. (I do Sahatna. Antong rap mangidogogo ma hita tu adopan ni Debata).**

**R : Ale Tuhan Debata, sai pargogoi ma hami mangulahon na hombar tu PatikMi. Amen.**

**06. Marende HG No. 411 : 1, 3 “NANG PE RARA DOSAMU” BL No. 274**

- ❖ *Nang pe rara dosamu, ias dibaen mudarHu  
Nang pe rara dosamu, ias dibaen mudarHu  
Na dapdap songon hasumba songon itak do  
Nang pe rara dosamu. Nang pe rara dosamu  
ias dibaen mudarHi, ias dibaen mudarHu.*

**(Jongjong)**

- ❖ *SesaonNa dosamu, ndang dibaloshon tu ho*  
*SesaonNa dosamu, ndang dibaloshon tu ho*  
*Tu Jesus ro ho na loja, disi sabam ho*  
*SesaonNa dosamu, SesaonNa dosamu*  
*Ndang dibaloshon tu ho, Ndang dibaloshon tu ho.*

## 07. MANOPOTI DOSA:

**U : Tatopoti ma dosanta tu adopan ni Debata, martangiang ma hita :** Ale Tuhan Debata, Pargogo na so hatudosan jala Ama Parasiroha ! Ndang lomo rohaM mida hamatean ni pardosa; mulak ma nian parjahat i tumadingkon dalanna, asa mangolu ibana, i do dipangido rohaM. Ala ni i umbahen hupangido hami; sai sundati ma torutoruM asa unang mangonai be tu hami. Sai sesa sude dosanami, asa mangolu hami di bagasan asi ni rohaM. Sai pargogoi ma hami, asa margogo hami, marhitehite Tuhan Jesus Kristus Tuhannami. Amen. -----*(Instrument)*-----

**U : Bagabaga ni Debata taringot tu hasesaan ni dosa :** Songon on do Hata ni Tuhan Jahowa : Nunga diarsahi ho Ahu marhite sian angka dosam, jala nunga dilojai ho Ahu marhite sian angka hajahatonmu. Ahu tutu, Ahu sandiri manalesei angka pangalaosim ala ni hadirionKu, jala ndang be hupaingotingot angka dosam. **Hasangapon ma di Debata na di ginjang!**

**R : Amen (Hundul)**

## 08. Marende HG No. 463 : 2 "PASUPASUM TONGOSONMU" BL No. 312

- ❖ *Buat ma angka pangambat, unang songsong dalam i*  
*Mual ni aek hangoluan ringkot do di rohangki*  
*HagogoonMu songgop ma tu rohangkon*  
*Unang sai holan manetek, gohi sandok diringkon.*

## 09. EPISTEL :

U : Hata ni Debata turpuk ni ari Minggu ROGATE on i ma na tarsurat di **1 Samuel 1 : 9 - 18**, Jadi dung mangan jala minum di Silo, hehe ma si Hanna. Alai hundul di hundulanna ianggo malim Eli di lambung tiang ni bagas ni Jahowa.

**R : Tung na marsak situtu rohana, gabe martangiang si Hanna tu Jahowa, huhut tumatangis situtu.**

U : Dung i marbagabaga ma ibana, ninna ma: Ale Jahowa Zebaot! Molo ditatap roham pardangolan ni naposomon, jala diingot Ho ahu, jala ndang halupahononmu naposomon, jala dilehon Ho tu naposomon sada anak, lehononku ma ibana muse tu Jahowa saleleng mangolu ibana, jala ndang jadi hona raut parnabung uluna.

**R : Jadi dung lelung ibana martangiang di jolo ni Jahowa, sai dipamanatmanat si Eli ma pamanganna.**

U : Ai martangiang di bagasan rohana do si Hanna, asal ubitubit bibirna, ndang tarbege ianggo suarana, gabe dirimpu si Eli na mabuk ibana.

**R : Jadi ninna si Eli ma tu ibana: Sadia lelung on ho mabuk? Utahon ma anggur niinummi sian ho?**

U : Alai ninna si Hanna ma mangalusi: Sitongka, ale tuanku! Parompuan na gondok roha do ahu tahe, ndang dung huinum anggur, manang siinumon na koras, rohangki do na huusehon di jolo ni Jahowa.

**R : Unang tung bahen naposom hira boru na jahat, ai sian ponjot dohot arsak ni rohangku na godang i ahu mangkatai rasirasa nuaeng.**

U : Dung i ninna si Eli ma mangalusi: Laho ma ho muli mardamedame! Sai na lehonon ni Debata ni Israel tu ho na pinangidom sian Ibana.

**R : Jadi ninna si Hanna ma: Sai dapotan asi ni roha ma naposomi di jolom! Dung i ditulus parompuan i ma dalanna, jala mangan, bohina pe, ndang be surbot idaon.**

U : **I do sahatna** : *Martua ma angka na tumangihon Hata ni Debata jala na umpeopsa. Amen.*

#### **10. Marende SDJ No. 815 : 1 - 2 "ULI DO TINGKI NA HOHOM" BL No. 815**

- ❖ *Uli do tingki na hohom di jolo ni habangsa ni Amanghu na rade tongtong manjalo pangidoanhi Ai di na marsak rohangki sai diapuli tondingki Malua sian jorgong i di tingki martangiang i. = Jongjong =*
- ❖ *Uli do tingki na hohom, sonang martua rohangkon Tongtong masihol rohangkon, lao martangiang na hohom Au raphon na badia i, sai naeng marnida bohiMi Tuhanku Sipartobus i, di tingki martangiang i.*

#### **11. MANGHATINDANGHON HAPORSEAON:**

U : Tahatindangkon ma haporseaonta i, songon na hinatindangkon ni donganta sahaporseaon di sandok portibi on. Rap ma hita mandok:

**R : Ahu Porsea..... (Hundul)**

#### **12. TINGTING**

**13. Marende BE No. 249 : 1 - 2 "NGOT MA HO O TONDINGKI" BL No. 122**

❖ *Ngot ma ho, o tondingki Dungo martangiang*

*Asa unang musu i Tole so tinagam*

*Bisuk ni setan i Do manait tu dosa*

*Lan na bonar roha. == Musik ==*

❖ *Ngot ma ho na modom i Di bagasan dosa*

*Asa unang ala ni Ho marutang hosa*

*Ai hatop Nang tahop Ro ma pangunjunan*

*Tu na so managam. == Musik ==*

**14. JAMITA : 1 Johannes 5 : 1 - 5**

**15. Marende HG No. 403 : 1-- "POS ROHANGKU DI TUHANKU" BL No. 402**

**(Pel. Ia, Ib & II tu Pusat)**

❖ *Pos rohangku di Tuhanku, ndang tarbaen tarhirim au*

*On do tongtong tangiangku : Tu lambungMu au patau*

*Lobi pos do rohangki, sai patulusonNa i, BoanonNa au tu si.*

**=== musik ===**

❖ *Huhilala ganup ari paniopNa di au on*

*Sai tong dipasarisari, naeng badia rohangkon*

*Naeng lam tu tinggilna i, Pinggol partondionki, lao mambaen lomoNa i.*

**=== musik ===**

**16. PANGUJUNGI: (Jongjong)**

**U : Tatangianghon ma peleanta:** Ale Debata, Amanami na di banua ginjang, Ho do haroroan ni saluhut silehonlehon na denggan dohot nasa ulibasa na mauliutus. Hupasahat hami ma sian na nilehonMi tu hami, peleannami tu Ho. Sai jalo ma i gabe uap na hushus di joloM. Pasupasu ma i jala ramoti asa huparhaseang hami pelean on, patimbulhon harajaonMu di

tongatonga ni huriaM dohot di portibi on. Buhai ma rohanami marhitehite TondiM, asa lam hutanda hami godang ni silehonlehonMi tu hami, asa lam girgir hami mandok mauliate tu Ho, marhitehite Jesus Kristus Tuhannami. AMEN

**R : (Mangendehon) BE No. 204: 2 NDANG TADINGKONONHU**

❖ *Nasa na nilehonMi, tondi ro di pamatanghu.*

*Hosa dohot gogongki, ro di saluhut artanghu.*

*Hupasahat i tu Ho, na so unsatonhu do.*

U : Ale Amanami na di banua ginjang! Sai pinarbadia ma GoarMu! Sai ro ma harajaonMu! Sai saut ma lomo ni rohaM di banua tonga on songon na di banua ginjang! Lehon ma tu hami sadari on hangoluan siapari! Sesa ma dosanami songon panesanami di dosa ni dongan na mardosa tu hami! Unang hami togihon tu pangunjunan! Palua ma hami sian pangago!

**R : (Mangendehon):**

❖ *Ai Ho do nampuna harajaon, dohot hagagoon.*

*Ro di hasangapon, saleleng ni lelengna, Amen*

U : Pasupasu !

**R : (Mangendehon ) Amen... Amen... Amen...**